

## 過去佛分衛經

西晉三藏法師竺法護譯

佛言過去世有佛入城分衛與尊弟子諸菩薩俱弟子菩薩姿容相好皆悉端正如本所行各得其道有一母人妊娠數月見佛及僧有所至湊心自計願我所懷子生如此使爲沙門佛弟子日月滿足即生安隱兒亦殊好與衆人異母以恩愛無斁令兒行作沙門中有覺意即自念言我前有願若我生子當使爲道兒今已生有異凡人令我安隱復無惡露不可戀憚恩愛之故違我本心子年七歲家復貧狹即作二人飯具及三法衣手持澡瓶自將其子行詣佛所稽首佛足前白佛言願哀我子使爲沙門令後得道身形如佛佛即聽之令作沙門母以澡罐前洗兒手應時

九龍從瓶口出吐水灌兒手中濕訖殘水散兒頭上水之潺滴於兒頭上化成華蓋珠交絡帳中有師子座上有坐佛佛笑口中五色光出照十億佛刹還遶佛身從兒頂入母以飯具前上佛并食其子子便發無上平等道意應時十億佛刹爲六返震動衆刹諸佛皆自然現佛以母飯飽爾所佛及諸比丘僧皆等飽足其飯如故亦不損減母即歡喜及無數天人皆得阿惟越致時兒髮墮成爲沙門即亦得立不退轉地母前白佛今我所見有三可怪我澡兒手九龍吐水此一可怪澡已殘水散兒頭上化成寶帳及師子座上有坐佛是二可怪佛笑口中光從兒頂入是三可怪願佛爲我分別說之佛言此兒却後十四劫當得作佛九龍當浴師子座華蓋寶帳佛

笑光從兒頂入皆是其應母聞佛言倍懷踊躍後當得作母人轉輪聖王積七百世竟其劫壽盡轉母人身當得阿惟越致佛言是時

小兒我身是我今於世功德如是諸天龍神

一切人民聞佛所說皆得阿惟越致

無熱佛性空佛天王佛金仁佛

過去佛分衛經